



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 8

Myanmar nung yimjung asoshi akok
tashi inyaksü: Ban Ki-moon

PM Modi-i National Games
lapoktsütsü



VOL. XX NO. 194 (ADOK 194) DIMAPUR YANGTEPNÜ (THURSDAY) RONGCHII (APRIL) 27, 2023 ₹ 5.00

PM Modi-i asür Parkash Singh Badal nem akum agütsü

Chandigarh, Rongchii/April 26 (Agencies): Taoba Punjab Chief Minister aser Shiromani Akali Dal (SAD) tekolakba Parkash Singh Badal tasü mang Bodhbarnü Chandigarh nung party office tonga liasü. Ato Kilonser Narendra Modi anü dang 12:30 ako meta SAD party office tonga aru aser akum agüja liasü.

Badal nem akum agütsü asoshi nüburttem Bodhbar anepdang nungi SAD office kima adenshia liasü. Ponguben Punjab chief minister inyaksang nem akum agüja Punjab sorkari Brestibarnü sodi anogo ta sangdongogo. Badal ya arishi küm 95 nung Mongulbarnü asü.

State nung sorkar offices, departments, boards, corporations aser kaket reju ajak Brestibarnü shibangtsü, ta sorkar sangdong ka ajanga ashi.

Badal ya mapang tatsüka temang mejungi aru aser tango junga mesashitba ajanga Mohali nung aliba Fortis Hospital-i hopta ka tejakdang anir oa liasü.

Pa tasü mang ya Muksar nung par Badal yimdaki Rajpura, Patiala, Sangrur, Barnala, Rampura Phul aser Bathinda ajanga bener aotsü aser Brestibarnü nung dang 1:00 ako nung aremsü, ta party lenir kati ashi.

Taoba Punjab chief minister

nem akum agüja central sorkari India tesem ajungalen April 26 aser 27 anogo mang ayimtsü sangdonga lir.

Tir Droupadi Murmu, Ato Kilonser Modi, central minister tem aser Punjab aser Haryana chief minister tem aser party balala nungi lenirtemi Badal asü khu lemsatapa liasü.

Punjab yimtenren nung tambosang ya 1970 nung chief minister akum aser coalition sorkar ka anir lias saka kümsük tembanga meinyaktet. Pa ya 1977-80, 1997-2002, 2007-12 aser 2012-2017 mapang chief minister inyaka liasü.

December 8, 1927 nü Malout anasa Abul Khurana nung Parkash Singh Badal aso aser Lahore nung aliba Forman Christian College nungi graduate süa liasü.

Pa Malout nungi 1957 küm Congress nominee ka ama state assembly nung tetsüing ajemok aser 1969 küm Gidderbaha assembly nungi SAD ticket nung takok ngua liasü. Iba mapang chief minister inyaka alisang Gurnam Singh 1970 küm Congress-i aoba sülen SAD lungjemshi aser Jana Sangh teyari nung sorkar tenteta liasü.

Iba sülen Badal ya linük nung chief minister tanubotising akum saka par sorkar küm shi dang liasü.

Dimapur yimti tiyong nung food-stall melapokdaksütsü mepishir

Dimapur, Rongchii/April 26 (TYO): Dimapur yimti tiyong nung tetsüing lenmang nung yokyayokchir aser talisa Clock Tower nungi Popular Bakery tsüingta food carts tem amenokba ajanga mapang talangka nüburttem timtem balala ajurua liasü, saka itemji agienba atema Deputy Commissioner, Commissioner of Police aser Dimapur Municipal Council indang Chief Executive Officer dang pelar, ta NST colony aser Middle Point colony indang Joint Colony Council sangdong ka ajanga ashi.

District ketdangsurtem den senden aiben amandang Joint Council ajanga iba tebilemstü ya benoka liasü aser item foot-stalls ajanga timtem bener arutsüba mita repringtsü atema aiben osang kaket nunga sangdonga aruogo aser onok colony nung lanur volunteer tema mapang shia tetsüing lenmang nung chair aser table yua aliba belendaksütsü yoka aru. Saka mapang tatsüka lir ano akhi ama lapoka aonung tesü tashi mena liasü, ta ashi.

District ketdangsur medeni council kisüing mapang shia tenük yoka ataba mapa ya tamakoktsü liasü. Item food-stall agienba atema yangi alirtem pelar aser iba mera ya tajung asoshi aser tarutsü anogotem nunga agitsü imlar, ta Joint Council ajanga ashi.

Takum alitsü asoshi aayangba tenüing nung nisung kati jila nung nüburt ajunga mesüra kidangkiyonger nem timtem magütsütsüla. Yangi parnok

indang stall tem tanaben lapoktsü mepishiyonga memelatsüla saka Super Market area ama tesem peria alidaki yoktsüla, ta parnokki ashi.

Ammang nung menur item food carts tem sünga taziokba maliba nisungtem adenshir aser aiben ayatirm aser anepbong nung tim masüba mapa inyaka temeket nung alirtem nem timtem agütsüba ajangshia aruogo. Parnok melapokba mapang food carts tem ya colony indang by-lane lenmang temesü mesüra nija ki indang kima nung anena ayuba ajanga colony nung alirtem senzüsempongtsü kanga timtema aru.

Parnok mashi mapang arua anepbong tashi business lapok, aser iba yongji nisung aika yimtong nung yi ajemba liasü, koba district administration mezüingmeshiba ka liasü. Food stall kar nung ken ola tulu lapoka atemba ajanga kidanger aser kaketshir kanga meinpronga aru, ta Joint Council sangdong ajanga ashi.

Bottle tejaksa, chiyongtsü tamajung aser talisa yi agi meseper dokan kima saksüba, tzü indokba aser karibo by-lanes nung tepok indokba ajanga nüburttem kanga timtema aruogo.

Ajidang masü item food-stalls tem mechi yimti nung traffic tali mesümenanga gari anena ayutsü timtem ajurua liasü. Anungji Joint Council ajanga Deputy Commissioner, Commissioner of Police aser CEO DMC dang yangi food stall tanaben melapokdaksütsü mepishir, ta ashi.

Legislator atema orientation sentong temogo



Nagaland Legislative Assembly nung legislator asoshi orientation sentong Nagaland Legislative Assembly Secretariat, Kohima nung ananü ayongzuka agiba April 26, 2023 nü tatemang sentong nung Minister, KG Kenye-i jembidang tangokba noksa nung angur.

Dimapur, Rongchii/April 26 (TYO): Nagaland Legislative Assembly nung legislator nem orientation sentong ka Nagaland Legislative Assembly Secretariat, Kohima nung ananü ayongzuka agiba April 26, 2023 nü tembangogo.

Iba sentong tembanga jembidang Minister, Power and Parliamentary Affairs, K.G. Kenye-i ashiba agi, menur tenükaka parliamentary affairs tsütsü linük den lirumedema aotsü asoshi state-i tajungtiba inyaker, ta ashi.

Pai state nung yimtenren tsütsü tatalokba balala indang kar lemsatapa liasü aser anti-defection law ya Nagaland nung mezüing benoka amshi, ta ashi.

Yamaji liyonga arudang

ozüing aser act tem melenshiyonga aru saka tamendak dak memelenshi aser ibai Indian democracy tebour ajungbaji alitsü, ta Kenye-i ashi.

Shisalen sayurtemi parliamentary inyakyim indang sayuba asoshi Kenye-i shisalen sayurtem dang pelaba lemsatapa liasü aser iba sentong ajanga legislator tem ajangzuka alitsü imlar aser House inyakyim tali tejangjaba nung metetjema alitsü südi, ta ashi.

Joint Secretary, NLA Secretariat, Darhu Shupao ajanga melepzüing o jembia liasü. Iba orientation tembanga sentong nung Speaker, Nagaland Legislative Assembly, Sharingain Longkumer; Commissioner & Secretary,

Parliamentary Affairs, Wezope Kenye aser dangar ketdangsurtem dena liasü.

Iba sentong ya Parliamentary Research & Training Institute for Democracies (PRIDE), Lok Sabha Secretariat ajanga ayongzuka liasü.

PRIDE, Lok Sabha Secretariat nungi iba sentong nung shisalen sayur ya Joint Secretary, Lok Sabha Secretariat, Vinay Kumar Mohan; Former Joint Secretary, Lok Sabha Secretariat, Ravindra Garimella; Director, Lok Sabha Secretariat, Santosh Kumar; Additional Director, Lok Sabha Secretariat, Partha Goswami, aser Additional Director, Lok Sabha Secretariat, Sovan Kumar Ganguli nungertem liasü.

JICA-i Medical College Complex nung teyari agütsütsü akok

Kohima, Rongchii/April 26 (TYO): Kohima nung Medical College complex tasenba nung multi-crore 400-bedded Hospital ka atema Department of Health and Family Welfare (DHFW), Nagaland ajanga Japan International Cooperation Agency (JICA) dang teyari meshiogo.

Iba maparen atema jembishinü ya 2018 küm tenzük, saka COVID-19 pandemic mechi küm asem jungnüa jembishinü mesüteti aru aser taoba küm tenzükshi, ta DHFW nungi ketdangsur kati ashi.

JICA India aser Tokyo nung aliba JICA Headquarters nungi team balalai iba project tesem semdangogo aser JICA Headquarters aser India nungi ketdangsur pezü den surveyor 12 tashi Mongulbarnü nungi Kohima nung arua level balala nung jembishinü akar.

JICA team ajanga medical college complex nung tang teyangludak 150-bedded hospital anasa 400-bedded hospital atema shimteta aliba tesem ka Bodhbarnü semdanga liasü.

JICA team ajanga iba tesem semdangba mapang Commissioner & Secretary HFW, Y. Kikheto Sema; Principal Director HFW, Dr Vibeitunuo Sachü aser Dean, Nagaland Institute of Medical Science &

Research (NIMSR), Dr Soumya Chakraborty nungertema liasü.

JICA team ajanga 400-bedded Hospital atema ali tendangogo aser tesem shimogo, ta pai osangbener dang ashi.

Küm nung MBBS menden 100 agütsütsüba medical college tenzüktsü atema National Medical Council indang Medical Assessment & Rating Board (MARC) ajanga 'Letter of Permit' agütsüogo, ta Commissioner & Secretary HFW, Y. Kikheto Sema-i JICA nungi arurtem dang metetdaksü.

Yipten 300 aliba Naga Hospital Authority Kohima (NHAK) ya NIMSR kübok 'teaching hospital' ka akumtsü lemzüktsü aser medical college indang 150-bedded hospital ya tekeraba nung maparen inyak tenzüktsü, ta pai ashi.

Iba dak sendakba nung, 430-bedded hospital ka nungdaka aliba nung medical college ya mapang tatsüka atema provisions ana nung lapoktsü, ta pai ashi. 2030 küm tashinung NHAK meyipa agütsütsü aliba ya Department-ibo aji masüding project ya renemer liner, ta ashi.

JICA ajanga Japanese technology bener arua 4 floor basement keter 15-storey 400-bedded hospital ka, ground floor ka aser ano storey 11 ki ya

yanglutsü kanga junga asadanger, ta HFW Joint Director, Dr Kikameren Longkumer-i ashi.

Iba project ya ano tatem kuma merenem, kechiaser department ajanga Detail Project Report (DPR) shidak yoktsüla aser iba sülen ang Central Ministries aser agency balalai asadangtsü aser ita asem-pezü tsüingta approve asütsü, ta pai metetdaksü.

Iba project ya tenzükra ibai JICA ajanga senotsü teyari agütsüba project tanabuba asütsü, kechiaser 2017 küm nungi tenzuka parnokki Nagaland Forest Management Project nem sen crore 500 shi jenjang senotsü agütsür.

Kasa mapang Dr Longkumer ajanga sangdong ka nung ashiba agi, JICA Headquarter nungi Rei Sagawa aser Hajime Taniguchi nati anir züngsem 17 aliba Japanese team ka, JICA India nungi teshimtet ketdangsurtem aser JICA Survey Team-i Kohima semdanga NIMSR Kohima campus nung 400 bedded Teaching Hospital amenoktsü atema jembishinü aka.

Ananü jembishinüba mapang Teaching Hospital building yanglutsü, osetsüset aser IT&C aser ano health sector nung Technical Collaboration inoksemsü molungtep.

(Maneni tapak 2 nung...)



Tawa agiba Nagaland general election nung Langpangkong tükong kübok Tuli, Arkakong aser Angetyongpang assembly constituency-tem nungi adoker MLA asem nem tenüngsang agütsüba aser parnok den shisalemsatepba sentong ka April 25, 2023 nü Kohima nung Langpangkong Senso Telongjem, Kohima pur kidang agiogo. Iba sentong nung Langpangkong Tükong Mungdang aser Langpangkong Kaketshir Mungdang nung lenirtem dena liasü. Iba sentong ya Langpangkong Senso Telongjem, Kohima-i ayongzükba liasü. Iba sentong temer Wb.Nuklutoshi Longkumer, MLA; Wb.Tongpang Ozüküm, Advisor, Water Resources aser Wb. A.Pangjung Jamir, Advisor, Fisheries & Aquatic Resources nungertem den Langpangkong nunger lokti tentet balala nungi lenirtem den agiba noksa ka yangi angur.

Mokokchung Urban Development Office nung Officer mali, tetsükdaktsü jenti ajurudagi

Mokokchung, Rongchii/April 26(TYO) : Urban Development Officer, office Mokokchung nung Urban Development Officer mali inyakym aika nung tetsükdaktsü ajurudagi.

Mokokchung nung Urban Development Officer shiba liasü pa ya taoba 2022 küm October 23 nü asü aser iba sülen jibo temelen marur aser ibaji ajanga office maparen aika nung kanga dang timtem aser tetsükdaktsü ajurudagi.

Iba osang züluri Urban Development Officer, office-i tsüngdong oagi office nung

inyakertem den ajurua jembidang, 2022 küm October 23 nü par officer asü aser iba sülen jibo temelen marubaji metetdaktsü. Parnokisa ashiba agi anogoshia department nungtak tongtipang aika adoker saka Officer maliba ajanga tetsükdaktsü aika ajurur, talisa maparen karbo district level nung dang atemtsü liaka officer malibaji ajanga Kohima tashi timtema aotsüsa akumer.

Mokokchung nung alirtem ali patta maparen aika dang adoker anogoshia iba maparen inyaktsü nübur aika office-i arur saka

parnok nungtakba mataloki joko ita aika arurta staff purtemisa metetdaktsü.

Department Directorate ajanga metetdaktsüba agi Directorate ajangabo sorkar dang Urban Development Officer, office Mokokchung nung Urban Development Officer agujangta zülüogota osangbo metetdaktsüogo saka tanu tashi Officer mali kangasa timtem ajurua tsükdakerta Urban Development Officer, office Mokokchung staff purtemisa metetdaktsü.

NBSE-i tatidang nung temelenshi indang metetdaktsü

Dimapur, Rongchii/April 26 (TYO): Nagaland Board of School Education-i sangdong ka ajanga, tangazükertem tali tetemsüba kümdaktsütsü aser tangazükba yimya tajungba kümdaktsütsü atema asdangshiba yimya melenshitsu asoshi National Education Policy (NEP) 2020 nükjidong aliba dak ajemdaker Board-i tatitang agütsüba yimya melenshitsu asoshi jenjang agiogo, ta metetdaktsü.

Tatidang ya basic learning outcomes aser core capacities/ competencies den taküm nung benshia aotsü atema skill aser shisatsü agütsütsü asoshi rangloker agütsü, ta kasa sangdong ajanga metetdaktsü.

Iba dak sendakba nung Board-i, Secondary aser Higher Secondary jenjang nung subject ajak atema Question Paper Design tem asadangshiogo. Design tasen dak ajemdaker Sample Question Paper tem yangluogo, koba subject ajak atema Class IX Phase I & II Examinations 2023, HSLC Examination 2024, aser Class XI Promotion & HSSLC

Examinations 2024 mapa amshitsu.

Board kübok züngoksema aliba school ajak dang iba tatidang Question Paper Design sülen anidaktsü aser iba den peta classroom nung tangazükba agütsütsü aser asadangtsü asoshi tetuyuba agütsüogo. Iba Designs tasenba ya Mid-Term Examinations 2023 nung benoka amshitsu.

Tekübolon agüja aliba booklets tem NBSE portal www.nbsen.edu.in nung angutsü:

Question Paper Designs and Sample Question Papers for Secondary Level aser

Question Paper Designs and Sample Question Papers for Higher Secondary Level.

Item kakettem indang hard copy May tanabuba hopta nungi Board indang Office nung agutsü.

Anungji iba dak sendakba nung Institutions tekolak ajak dang temelenshi temlungdang ayutsü aser tesayur aser kaketshirtem nem resource agüja aliba amshitsu atema tetuyuba agütsütsü asoshi metetdaktsüogo.

Mokokchung District VDB Association lokti mungdang aka



Mokokchung District VDB Association lokti mungdang April 26 nü Mokokchung town hall nung akadang Deputy Commissioner, Shashank Pratap Singh, IAS-i jempiba noksa angur.

Mokokchung, 26 April (TYO): Village Council aser Village Development Board (VDB) ya kanga dang tongtibang riju ana lir, kechiyong ana ya tanga lokti dang nungi khenyongi balaka lir, anungji, pei teinyaktsü nükjidong mamatoktsüla. Iba o a Mokokchung Deputy Commissioner, Shashank Pratap Singh, IAS-i Mokokchung District VDB Association lokti mungdang April 26 nü yangi Mokokchung town hall nung akadang metetdaktsü.

Village Council aser VDB ya planning department mesüka lir, kechiyong planning department ajanga state rangben atema mapatong balala asayameyanga inyaker, district sasep nung district planning board ajanga district atema inyaker, yamaji village council aser VDB yagi yimtsüng terenlok mapa atema inyaker, ta Mokokchung DC-i ashi.

“Yimtsüng nung terenlok maparen balala inyakdang nisung kar mulungka nung masü saka yimkong ajangzüktsü nükjidong yur inyaktsüla”, ta pai ajungshia liasü.

Mokokchung Dist. VDB Association tenzüker joko küm 18 jungogo, anungji,

Mokokchung district aser Nagaland songjen asoshi mapa tajung inyaktsü Mokokchung DC-isa ayongzük. Paise association nungdakba maparen ajak nung yariteptsü mulunga lir, ta shisem.

Village council ya sobaliba aser yimsüyimpang dak sentakba tentet ka aser VDB ya tanü tendak apet yim terenlok asoshi tentetba lir. “Riju ana ya tanga telok dang nungi khenyongi balaka (unique) lir aser riju anaprongla teinyaktsüji kanga tongtibang, anungji, nükjidong mamatoktsüla”, ta ashi.

Iba sentong nung Mokokchung DRDA Project Director, M. Toshimongla Kichu-i mapang tatsüka agia jembidang, Mokokchung district tejakleni aotsüba/maotsüba jeni nak dak tuluka keta lir, anungji, nenoki nenok mapa ya züba-züba magitsüla, ta ashi.

Govt.-ibo project-temji tongmelang ka dang agütsütsü, anungji, mapa tasen yangerteta (creative süa) aser ochi shia inyakdaktsünür, aser terenlok mapa kechi inyakdir inyakaka, alima tzi mopung aser arem min wazüka aser kümzüka ayutsüba janga tongtibang, ta laisa shisem.

Mungdang nung Mokokchung district kübok RD

block 9 nungi VDB secretary-tem, Council Chairman, VDM züngsemtem, block balala nungi BDO-tem aser DRDA nungi ketdangsurtem aden. Tanü iba sentong nung Mokokchung District VDB Association tir, Dr. Imtinungba Atsongchanger-i tarurtem pela-a agizükba den Executive Member – Imtiyanger Imchen-i tepela o jembi. Chuchuyimpang Village Council Chairman - Temsumoa Imsong, Mongchen Village Council Chairman – Aonungsang Mollier aser Chakpa Village Council nungi nisung kati mapang tatsütsü agia tepela o den tajungshi o tulu bener arua mungdang sanger ayongzük.

Mokokchung District VDB Association 2023-2026 kümsük atema ketdangpur itemi shimtet:

1. President: Chutensangba (Ungma)
2. Vice President: Bendang Walling (Yimchalu)
3. General Secretary: Bendang Sütsün (Kangtsüng)
4. Asst. General Secretary: Sashimere (Mongsenyimti)
5. Treasurer: I. Wati Kichu (Mokokchung yim)
6. Finance Secretary: Atiba Imchen (Satsü yim)



Ministry of Women and Child Development-i tuyuba nung ajemdaker, District Child Protection Unit, Mokokchung-i Care & Support Children Home nung anogo 3 nü saisapong benjong sentong ka ayongzuka akaba mapang tangokba noksa nung angur. Iba benjong nungji carrom, ludo, penalty shootout, tug-of-war, high jump, 100 meter race, relay race, long jump, arm wrestling aser Naga wrestling nungertem asayaa liasü. Mokokchung, April 26, 2023

JICA-i Medical College Complex... (TYAPAK 1 NUNGI...)

JICA nungi teshimtet ketdangsurtem den tatembangba senden ya Commissioner & Secretary, H&FW Y. Kikheto Sema mendenpuba kübok NIMSIR conference hall nung mena liasü, kong Principal Director, Dr. Vibeituoquo M. Sachu, Dr. Soumya Chakraborty, Director NIMSIR aser NIMSIR aser Directorate of H&FW nungi ketdangsurtem dena liasü.

Iba mapang geological survey nung ajemdaker facility planning, project nung indoktsüba sen, project mapa kuma inyaktsü atema mapang aser Project

Management Unit tem tentettsü atema tatem kuma jembia liasü, ta pai ashi.

Teaching Hospital building nungya level 14 alitsü aser kilem nung helipad ka alitsü aser yangji patient care services aser teaching facilities amala alitsü. Iba mozüki nungya health care nung technology tasenba inoktsü.

Iba project ya Nagaland nung Externally Aided Project tulutiba asütsü aser Nagaland state ngur küm 60 tsüngta JICA project tanabuba asütsü, ta Commissioner & Secretary, Kikheto Sema-ia shia liasü.

Chhattisgarh nung IED bomb amshia amakdang sepai 10 asü

New Delhi, Rongchii/April 26 (Agencies): Bodhbarnü Chhattisgarh state kübok Dantewada nung Maoists telungpurtemi ali telung nung IED bomb rema yutsür sepaitem amakba lendong nung security sepai ter den gari anisang süogo.

Asürtemji Joga Sodhi, Munna Ram Kadti, Santosh Tamo, Duglo Mandvi, Lakhmu Markam, Joga Kavasi, Hariram Mandavi, Raju Ram Kartam, Jayram Podiam, Jagdish Kavasi aser driver, Dhaniram Yadav nung liasü, ta jangaogo.

Iba tatalokba osang angashiba sülen Chhattisgarh Chief Minister, Bhupesh Baghel-i twitter ajanga, DRG sepaitem amakba ya kanga tia maka tatalokba ka lir, aser onoki asürtem nem akhüm agütsür, ta metetdaksü.

Osangbenertem den

jembidang Baghel-i, "Lendong agütsür telungpurtem dang tai matoktsü. Onok ket nung iba osang lir. Onoki mangyimer kibongtem den tejashi lemsateper. Iba tongbang ya tatembanglen kati arudar. Maoists telungpurtem dang tai matoktsü," ta metetdaksü.

Union Home Minister, Amit Shah-i phone ajanga Chhattisgarh chief minister den iba osang metetpela aser akokba tashi Centre-i yariteptsü, ta metetdaksü.

Amit Shah-i twitter ajanga, Dantewada nung sepaitem amakba osang angashia jashir aser mangyimer kibongtem den tejashi lemsateper, ta metetdaksü.

Ano külen Chhattisgath IG, Sundraj-i sepai tongti ketdangsertem den senden ka mena iba tensa asadangogo.



April 26, 2023 nü Aam Aadmi Party (AAP) nungi Shelly Oberoi aser Aaley Mohammad Iqbal na Delhi Mayor aser Delhi Deputy Mayor shimba sülen tenati takok anguba temaitsü sayuba noksa nung angur. BJP nungi mayor candidate Shikha Rai aser deputy mayor candidate Soni Pal nati nominations agienba ajanga Oberrio aser Iqbal na den tetokteper makai tenati takok angu.

Punjab nung ponguben tashi Chief Minister inyaksang, Badal süogo

New Delhi, April 25 (Agencies): Punjab nung kümsük (term) ponguben tashi Chief minister inyaksang aser SAD party lenir, Parkash Singh Badal private hospital ka nung treatment tagidak mapang Mongolbar aonung süogo; pa arrshi küm 95 liasü.

Mohali nung aliba hospital ketdangsertemi sangdong ka ajanga, "S Parkash Singh Badal nem treatment shidak agütsüyonga mekümzükteti süogo. Parkash Singh Badal asüba atema Fortis Hospital Mohali-i mangyimer," ta metetdaksü.

Padal aonung 8:00 ako meta asü, ta hospital Director Abhijeet Singh-i metetdaksü.

Hopta ka tejaklen pa tangu sashiba tsütsü timtem ajuruba sülen pa Fortis Hospital-i anir oa treatment tagidak liasü.

Parkash Singh Badal ya Punjab kübok Abul Khurana nung aso aser Lahore nung aliba Forman Christian College nung zünga liasü. Pa mezüng yimdak sarpanch inyaka yimtenren nung ajemok aser 1957 küm pa arrshi küm 30 asüandang pai assembly elections nung mezüng toktepa liasü. Iba mapang nungji pa Congress party nung liasü.

Punjab nung Chief Minister

inyakertem rongnung tanubotibaji pa lir. Pa mezüng Chief Minister asüandang pa arrshi küm 43 dang liasü.

Küm 70 shi yimtenren nung alidang pai election nung tamakok anaben dang angu. 1967 küm mezüng pai tamakok angu aser 2022 Punjab assembly election nung tamakok angu.

2020 küm aluyimba dak sendakba ozüng tasen asem anema aluyimertemi longkak aيتدang aluyimertemi pusema pai aniba SAD party-i BJP den teloktep raksa. Aluyimertem longkak aitba onük nungsa pai Padma Vibhushan award-a meyipa agütsü.

Pa asüba osang angashia Ato kilonser Narendra Modi-i, "Parkash Singh Badal asüba atema kanga jashir. India nung yimtenren nung pa ya tongti ka liasü aser pai linük atema shilem tajung agiogo. Pai Punjab nung atema anibelem arema meranga inyak aser timtem mapang nung state ania liasü," ta metetdaksü.

Defence Minister Rajnath Singh, Congress Tir, Mallikarjun Kharge aser Congress lenir, Rahul Gandhi nung densema lenirtem aikati pa nem akhüm agütsüogo.

Operation Kaveri kübok Sudan nungi India nung 530 anitetogo



Jeddah, April 26, 2023: India nung Operation Kaveri kübok rara aliba linük Sudan nungi India nung aniteta Jeddah (Saudi Arabia) tonga anir arudang Union Minister of State for External Affairs, V. Muraleedharan-i India nung agizükba noksa nung angur.

New Delhi, April 26 (Agencies): Tang rara adoka aliba Sudan linük nungi Indian Air Force (IAF) indang tayimtsü ana nung India nung 250 aser Navy rong ka nungi India nung 278 anitetogo, ta Bodhbarnü ketdangsertemi metetdaksü.

Tang tashi nung India nung 530 Sudan linük nungi anir aruogo.

India sorkari mission 'Operation Kaveri' tenzükba sülen Jeddah yimti (Saudi Arabia) nung transit facility ka amenok aser India nungertem Sudan nungi anitetba sülen Jeddah-i anir aoer.

Mongolbarnü India nung 278 Indian Navy indang INS

Sumedha rong ajanga anir arua liasü.

Iba sülen ghonda ishika lir IAF indang C130J tayimtsü ana Port Sudan tonga oa India nung aika anir aru.

External Affairs Minister, S Jaishankar-i, mezüngbuba C-130J tayimtsü ajanga India nung 121 aser tanabuba tayimtsü jagi India nung 135 Jeddah-i anir aru, ta metetdakttsü.

Sudan nungi India nung anir arutsü atema Operation Kaveri tenzükba sülen India-i Jeddah yimti nung control room ka amenoka liasü aser India nung anir aruba maparen achaayangtsü atema Minister of State for External Affairs,

V Muraleedharan Jeddah yimti yok.

Tesüiba anogo 12 tashi Sudan nung army aser paramilitary sepaitem tsüngda raradar aser tang tashi nung nisung 400 shi asüba den aika yiruogo.

Hokolbarnü tongti ketddangsertem den senden amendang Ato kilonser Narendra Modi-i India nung Sudan nungi anir arutsü atema tuyua liasü.

Sudan tensa atema Jaishankar-i Saudi Arabia, United Arab Emirates, Egypt nungi Foreign Minister tem aser UN Secretary-General, Antonio Guterres den senden menogo.

SC-i kasa kiyimba onük ya Parliament nem agütsütsüla: Centre

New Delhi, Rongchii/April 26 (Agencies): Bodhbarnü Centre sorkari Supreme Court dang, linük nung kasa kiyimtsü (tetsür o tetsür na mesüra tebur o tebur na kiyimtsü) atema mepishiba onük ya Parliament nem agütsütsüla, ta metetdaksü.

Centre tenung nung jembir, Solicitor General Tushar Mehta-i, Chief Justice D Y Chandrachud leniba nung judge pongui akümba constitution bench dang, iba onük ka kanga tebenja aser loktiliba nung mejungi kongshitsüsa aliba onük ka lir, ta ashi.

Iba ken o anogo pongunübuba angadangba mapang nung Mehta-isa, "Kiyimba teratet aser shirnok

tsüngda kiyimtsüla, ibaji shibai telemtetba agütsü, ta asüba tasüngdangbaji ji tongtibangtiba lir," ta ashi.

Constitution bench nung tanüngba züngsem pezüji Justices- S K Kaul, S R Bhat, Hima Kohli aser P S Narasimha nung lir.

Iba onük ya ajanga loktiliba nung lenla aika nung kongshitsü, anungji iba onük atema loktiliba nung aser state legislatures nung tama o toktepa jembitsüla, ta pai ashi.

India nung kasa kiyimtsü atema SC nem temepishiba agütsürtemi Mongolbarnü Supreme Court dang, kasa kiyimtsü atema parnok temeden agüjang, ta nenshia shiogo.

Kasa meimtepertem tenung nung jembidang senior advocate Saurabh Kirpal-i bench dang, "Kasa kiyimba temeden magütsüra ibaji jakdaka 'nisung bendangshidanga züngshiba' asütsü aser ibaji ajanga kasa meimtepertemi kiyimtsü aser temeden balala atema bendangleni aotsüsa akümtsü," ta metetdaksü.

Senior advocate Saurabh Kirpal-a kasa meimteper (gay) lir. Parnok atema jembitsür lawyer tem rongnung kati, G20 züngsem linük 20 nungi linük 12-ibo kasa kiyimba melaogo aser alima nung linük 34-ia iba temeden agütsüogo, anungji India-ia iba temeden agütsütsüla, ta bench dang ashi.



April 26, 2023 nü Chandigarh nung Ato kilonser, Narendra Modi-i taoba mapang Punjab chief minister aser Shiromani Akali Dal (SAD) lenir, Parkash Singh Badal mang jakdang asür nem akhüm agütsüba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, RONGCHII (APRIL) 27, 2023

Pei rongsen amshitettsüla

Nagaland tesem balala nung gari nung atsükba totzü ton million 600 dak tali den mi kuma amshiba ali tango (natural gas) agir magima atsüteta agitsüsa ali telonglen rema lir, ajisüaka asenoki memetetba agi aser asenok yimten aser lokti tebilemetsü aliba agi agiteta mamshitetter. Akhidang, kum 50 jakdang Nagaland government-i ONGC telok nem Nagaland nung totzü ali mali tendanga inyaksü asoshi temelaba agütsü, anungji ONGC purtemi ali telong peria ir totzü bushia agitet aser Nagaland government den tejembitsü ka jungjunga jembia renemer nyak masü saka tetendangsü kisung temelaba agütsüba tenung nung tayoktsü asoshi dena agiteta ayokba otsü lir. Iba jagi 1993 kum ONGC teloki Nagaland government nem alimelen asen crore 33 agütsüba jembia angashiogo. Iba sülen, talisa, Naga nunger yimten nüchiso bushir teloki Naga yimten nüchiso mangu tashi Naga lima nung ali telong nung rema akaba rongsen kecha agiteta mamshitsü ta shia nokdangba agi, iba tashiji metizüktet Nagaland government o ONGC na tangatettep nung Nagaland nung totzü bushia atsüteta ayoktsü mapa tenzüka inyaka liasüba anen. Iba sülen aiben merangdangogo saka tang tashi kecha telokia Nagaland nung totzü bushia agiteta inyaksü makoker. Atangji, mapang kabo center government o Nagaland government na tsüngda Nagaland ali telong nung rema akaba totzü aser tanga ali rongsentem madakji shiba kibur asütsü ta ashishitep, kechiyong ali telong nung akaba rongsentem madakbo state ajak nung center kibur asütsüsa temzüng nung lateta lir saka Nagaland-bo state akümdang center government-i mulunga latetba tangatettep onük 16 rongnung onük 7 nung clause 4 nung, ali aser yangji aliba rongsen madakbo center kibur asütsü makok, kechiyong parliament nung latetba ozung kecha agia Naga nunger li aser yangji aketba rongsentem alentsü makok ta kanga jangjaa shia lir aser kasa tangatettep onük ya temzüng kuma linük temzüng Arla 371 (A) nung enoka lir. Iba tashi aser temeten agi Nagaland metener, anungji temzüng nung shia aliba ama Nagaland nung ali aser yangji keta aliba rongsen bushia amshitsü atemabo Nagaland state government mulung asütsü. Ajisüaka, Nagaland nungbo timtem kaji, ali ya state government meyong masü, ali kiburtem meyong, anungji ali kiburtem mepeladaksüiang par li nung aliba rongsen bushitsü aser agiteta agitsü makoktsü. Iba temeten jagi asenokbo temoatsü asütsü melen timtem aser takoksa-ang ajurudagi. Aji oda, yashiang Nagaland aser Assam Chief minister na pronglai mulunga Assam aser Nagaland na tsüngda artsü ken o mangatettepi alidak tesemten nung külemi gari totzü aser ali tongoji bushia atsütsü aser yang nung jagi aruba senotsüa kasasa lemdangtsü ta tangatettep ken o ka yangluba asenoki angashiogo. Ajisüaka, tenati jembibajia mapa kuma meinyaktettsüsa telok ishikatibo ola adokogo. Item rongnung NNPGs teloki India den Naga yimten ken o melatettep tashi Naga lima nung totzü bushia agitettsübaji memelatsü ta shiogo aser ano tangar telok kari totzü bushia magitet dang tamasa Assam-i Nagaland anema artsü ken o okadak agüja alibaji meyipa agitsüla ta metetdaksüogo. Item kulitem ajakji shitak lir, anungji government-i bilemdangtsü imlar. Atangji, ali telonglen nungi Assam nung totzü atsürtemi Nagaland nungi a atsür ta jembiba angashir. Ano, tanü asüngbo akok tashi gari ya totzü agi masü saka anü tashi agia senzütsü apusor, anungji kenlirbo totzü ya menügdaksü aser nungdakyonga jenjang ajemtsü ta jembiba angashir aser atangji ibaji center government sentong lir. Ibajia asenoki angateta inyaksü nungdaker. Atangji, Tsüngremi Naga lima nung rongsen jenti aremokja lir saka Naga nungertem item jagi sen kümdakja mamshitetter, iba jagi Naga nungertem ya takar chir ser nung mazung memetet aser mapa nyak mashiba agi tangar memenep timtema alir amai alir. Pibo pei state nung Tsüngremi moatsüba rongsentem totzü aser gas nungi tenzüker süng, long aser süngo tu tashi agi tagitsü rongsen kuma yanglur agiba agi kija kibonga aser yimtena takar akümer. Ajisüaka, asenok Nagaland nung alirtemibo rongsen bushia mashi aser tamshia mashi, iba jagi kija kibong dang masü saka state government-a kum süi shia tesensakba-tesensakba akümer. Atangji, asenoki ali mijang yateta ayoker saka iba jagi teti atema ali aser ayong raksatsüba takoksaji tanü asenok tajangzük tilaka anguba den kenyongi asadangteptsü makok. Itemji bilemdanga, asenoka pei meyong rongsenbo peisasa bushia agiteta amshitettsüsa asenok dak temetetba shisatsü aser tangatettep alitsü kanga nungdaka kumogo.

OLEMSABANG

ASEN JABASO-JALAJI ASENI NOKSA LIR

~ L. Kika Pongener.

(Yashi adok nungi...)

Kechiyong ne ket agi züsentetba nai achitsü, na tepelatsü alitsü, aser ne kidang kilung nung ne kinungtsüji tejang atangba tsükmenatsüdong ama alitsü, ne chirtem ne langbang meketa Oliv sungdong ama alitsü. Ajiang Kibuba tsüngken tsübuba nisungji yamaji alitsü" (T.Ken -128:1-4). Asenoki Tsüngrem tsüngken tsübua yimten, arogo aser lokti tenzüka mapa ajak nung ochishia indangindanga tenzükra, Tsüngremi asen nem senmangtsü chirnur tajung moatsütsü, aser chirnurtemji alima asoshi nungdakba watsü-wabong tajung asütsü. Asenoki Tsüngrem tsübua chirnurtem tim lenmang nung anitetra, parnoki asen nem meyipa agutsütsü aser asenok iba maongka nungji pelaseta taso-a shizüka alitsü. Ibaji Tsüngrem tsüngken tsübua alirtem asoshi temoatsü senmangji lir.

Ajisüaka, shirnoki Tsüngrem jashitsüsa, nuburi maginütsüsa, yimten, arogo, lokti nung ochimashi tenzüker, aser yimden, arogo aser loktiliba nung pesaperong, mepetmesu, telemsa adoktsüsa tenzüker, parnokjibo Tsüngremi memoatsütsü aser tia makar karbo tera dena atsütoktsü. Tetezü... Senmangtsüsa chirnur tajung mesotettsü mesura sotetyong-jia senmangtsüsa masütsü. Anungji asen dak nungi chirnur tajung jakzüktsüsa asenok taküm alitsü kanga tongtipang. Aji oda, nisungibo kechi shidir shiang, tangari anguyonga manguyonga, asenoki indang-indanga, ochishia, asüngteta lira, asen dak nungi chirnur/semchisemnur tajung jakzüktsü. "Kibuba dak amangang aser tajung inyakang; ajisura na ali nung taso shia alitsü" (T.Ken-37:3). Asenok alima nung tatsüka alidang jangratema pela-a linura, mapa tajung inyakdi aser ochishia lidi. Shirnoki ochishia taküm junga alir parnok sulen teti temoatsütem anidaktsü. Tsüngrem o-i ashir, "Temeshipur senzüka yutsüba ni mangu; mesura pei chirtem meshimetsüba ni mangu (T.Ken-37:25). Tsüngrem o-i ashibaji, Tsüngremi temeshipur kodanga senzüka meyutsütsü aser parnok dak jakzükba chirnurtem meshimetsüa ala-ashia metoktsütsü nangzüka lir. Asenoki o agi aika rasa-a mejembiaaka, asen jabaso-jala jagi asenji kechi'ar sayutsü aser asenok taküm koda lia aru ajakji parnoki sayutsü, kechiaser jabaso-jalatemji tsürabur noksa lir. Anungji asenok dak nungi sungjang tajung alimai ongzüka achitsüsa, asenoki asen tenzüka yimten, arogo aser lokti ajunga nung ochishia aser indangindanga tenzükdi. Asenoki aseni inyakba mapa ajak nung nuburi temulung lemtettsüsa, tangari ngu-aka, mongu-aka, metet-aka, memetet-aka, tashishitsü kecha mekai, ochishia aser indangindanga inyakdi aser tenzükdi ta ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Tenla kidangi aoer shilem 77%-i 10 shilem agütsütsüla ta bilemer

April 26, 2023: Tenla kidangi tekülem nung adentsü aoertem rongnung shilem 77-ibo tanü tensa nunga pei Arogo mesüra Khristan Ministry nem ter shilem (10%) agütsütsüla, ta bilemer.

Parnoki, peii anguba income nungi shilem ter agütsütsüji Laishiba tetuyuba lir ta bilemer, ajisüaka ter shilemji kong aser koma agütsütsüar parnok rongnung tangatetba balala lir.

America nunger Protestant Khristan aser Tenla kidangi aoer nisung pezü shia nungi nisung asemibo (shilem 77), ter shilem agütsütsüji Laishiba nung tuyuba ozüing lir aser tanü tensa nunga iba tetuyuba ya inyaksüla, ta bilemer.

Tenla kidangi aoer shilem 10-ibo tanü tensa nung ter shilem magütsütsüla, ta bilemer aser shilem 13-ibo iba onük nung ratamadar, ta survey ka ajanga bushitet.

2017 küm agiba kasa survey ajanga, shilem 83-i ter shilem agütsütsüji tim, ta tangatetba liasü, anungji 2017 küm den medemdangra, tanü tensa nunga ter shilem agütsütsüji tim ta asüba tangatetba alirtem shilem 6 agi tajemba kümogo.

Lifeway Research nung executive director, Scott McConnell-i, "Tenla kidangi aoertem rongnung Tsüngrem nem tenla agütsüba onük nung tangatetba balala lir. Ter shilem agütsütsüji tim, ta tangatetba alirtem tera tajemba akümbaji iba onük nung tesayuba peria magütsüba agi lir," ta metetdaksü.

Khristan denominations balala medemdangra, ter shilem agütsütsü tangatetba alir tajemba aliba telokji Lutherans (shilem 59) lir aser ter shilem agütsütsü tangatetba alir teimtibaji Evangelicals (shilem 85) lir.

McConnell-i, "Tsüngremi nü nem ter shilem agütsüdaksüner, ta asüba aser ter shilem agütsüba naji balala. Ter shilem magütsürtemi mapang shia tenla tulu agütsür, aser karibo peii agütsünüdag agütsür. Laishiba nung aiben shia aliba ama, Tsüngrem nem tenla agütsütsüji atangji nungbo temela masü," ta metetdaksü.

Tenla kidangi aoer aser ter shilem agütsütsü tangatetba alirtem rongnung shilem 90-i, ter shilemji pei Arogo nem agütsütsüla ta ashir, ano karibo Khristan ministry ka nem agütsütsüla, ta ashir. Ano shilem ishikatibo ter shilemji nüngdabapur kar nem agütsütsüla mesüra teti maoba Arogo kar nem agütsüyonga kecha masü, ta ashir.

Lifeway Research-i iba survey ya online ajanga agia liasü aser iba survey nung America nunger Protestant 1,002-i shilem agi.

ISWAP-i Nigeria nung Pastor ka tepset aser Fulani-i Khristan 134 tepset

Abuja (Nigeria), April 26 (Agencies): April ita mezüngbuba hopta nung northeast Nigeria nung Islamic kiralongrartemi pastor ka tepset aser Benue state nung Fulani Muslim nunger teloki Khristan 134 tepsetogo.

April 4, 2023 aonung Bui County nung Islamic State West Africa Province (ISWAP) kiralongrartemi Church of the Brethren in Nigeria (EYN) nung pastor, Rev. Yakubu Shuaibu tepsetogo, ta EYN lenir, Salamatu Billi-i metetdaksü.

Parnokisa pastor kinüngtsü mashisa dak injang agi khalokja yirutsüba sülen Bui jila nung aliba Bui General Hospital-i anir oa treatment agidar.

Pastor Shuaibu tasü mangji Adamawa state kübok par jila Dzangwala nung remtsüogo.

"Pastor kinüngtsü tekeraba nung aneptsü atema sarasademtsüdi. Par kibong, Arogo nung züngsemtem aser

Borno state den Adamawa state nung Arogo tenzüker lenirtem atema sarasademtsüdi. Northeast Nigeria nung kiralongrartemi Arogo nung tenzükerter arishiba manener. Mapang tatsüka tsüngda EYN nung pastor asem tepsetogo," ta Billi-i metetdaksü.

ISWAP-isa April ita mezüngbuba hopta nung Khristan aika aliba yimtsüngtem- Njimtilo, Pulka aser Ajiri Mafa amak, ta Khristan lenir, Josephine Joseph-i metetdaksü.

"Yimtsüngtem amakba mapang nung kiralongrartemi Khristantem ki raksatsü aser kidang nungi auyaogo," ta Joseph-i metetdaksü.

April 2 nungi April 10 tashi nung Benue state nung Fulani Muslim nungertemi Khristan 134 tepsetogo, ta Benue state Governor, Samuel Ortom-i sangdong ka nung metetdaksü.

"Hopta ka tsüngda Fulani teloki Khristan 134 tepsetogo,"

ta pai metetdaksü.

Fulani telok jagi local government areas- Makurdi, Guma, Otukpo, Apa aser Logo amak; parnokisa Kwande County-a amak, ta Universal Reformed Christian Church (NKST) nung Tir aser pastor, Dominic Anza-i metetdaksü.

Joko item tesem aika nung Roman Catholic Arogo, Methodist Arogo aser Pentecostal Arogotemi tekülem sentong-a ayongzüka magiteter, ta pai ashi.

2022 küm alima nung Khristantem teimtiba tepsetba linükji Nigeria liasü. Yaküm Nigeria nung Khristan 5,014 tepsetogo (Open Doors' 2023 World Watch List report).

Tang alima nung Khristantem alitsü tamajungtiba linüktem rongnung Nigeria ya jenjang 6buba nung lir; 2022 küm nung jenjang 7buba liasü aser tangbo jenjang 6buba kümogo (Open Doors' 2023 World Watch List report).

ANO GO ABEN TSÜNGREM DEN

Tenüngsang

Aser kodang parnok rongnung kati pa anepba angu, pai meyipa ola tulu agi Tsüngrem tenüng asang aser pai tetsüng nung aputaka Pa nem tenüngsang; aser Paji Samaria nunger liasü. Luke 17:15-16.

Tenüngsangji Khristan taküm kimong lir. Tenüngsangji temoatsü arulen repranga meteta agizükba lir. Khristan ka ama asenok dang tai atok, tasü nungi kümzük, aser Tsüngrem chirtem ama mesütet. Tenüng asangba mulungjang asoshi iba dang tajungba kuli malitsü!

Yisu mapang nung chitemra aketer telok nungi jentoka liasü. Iba tia nung parnok temeimbatem den pilaa ali. Kodang chitemra aketer teri Yisu ajuru, parnoki Pa dang parnok dang aochiang ta kanga mepishi. Yisui parnok putir dangi yok. Parnoki tashi angaba ama, parnoki aneb! Item chitemra aketer terji parnok yimdaki marudaksü, parnok kidang melidaksüi, parnok mapa meinyakdaksü mesüra parnok tanurtem daka mekongshidaksü. Parnok kidangi meyipa aodang koda ka pelar alitsü, bilemdangang!

Parnok rongnung ka, Samaria nunger, anener, meyipa asema orr Yisu nem tenüngsang agütsü. Yihuda nungeri Samaria nungerji sempa saka Yisui pa anebtsü! Yisui pa dang asüngdang, "Tangartem to kong lir?" Chitemra aketer ter aneb. Chitemra aketer ter parnok temeimbatem osangtajung lemsateptsü pelashishia kidangi ao. Saka kati dang temoatsü arudak shisadang aser anener, asema orr tenüngsang agütsü, shibai pa taküm meyipa agütsü pa külem.

Asenoka Kümtetdakba ajanga aneptsü. Kümtetdakbai aochia agütsüba taküm pelaa alitsü asenok nüji lir. Chitemra aketer telok amaji, Kümtetdakba nem anener tenüngsang magütsüi asenok temoatsü nung pelateptsü aritepa aor asü?

Tsüngremi asenoki tenüng asangba repranger. Asenok tekülem, sarasadem, tenzükbaba aser anogo shia taküm Tsüngrem tenüng asangba dena alitsüla.

Uganda linük nung sayutsüngirtem yarir Khristan ka tepset

Nairobi (Kenya), April 26

(Agencies): Anüdoklen nunger den Khrista Uganda nung Islam yimsü alia osangtajung lemsateptsü amangertemi Khristan ka atema pai inyak aser pai tepsetogo, ta osang ka ajanga sayutsüngirtema aika yaria metetdaksü.

April 08, 2023 aonung Sironko District nungi Engineer Herbert, Mbale jila nung lia Muslim nungertemi aikati Islam yimsü toktsür pa kotari agi tsüngset; Pai Khristan yimsü agizüka liasü," ta metetdaksü.


Pastor den Khristan kati

Osangbener den Herbert tasü mangji April 9 jembidang pastor kati, anepdang 9:00 ako meta angu. "Herbert-i evangelistic mapa Khristan ka jagi, "Pastor kanga yakyaka inyak. künati pa maitsüji reprangteta Nkoma, Nakaloke, liasü. Pa tekolak, teberem Busajabwankuba, Nauyo, aser teka nung zübo aika Kabwangasi aser Mbale yimti liasü," ta metetdaksü.

tesem balala nung Muslim nunger den Khrista Uganda nung Islam yimsü alia osangtajung lemsateptsü atema pai inyak aser pai sayutsüngirtema aika yaria aruogo. Pai mission mapa inyakba aser sayutsüngirtem

Engineer Herbert, Mbale jila nung lia Muslim nungertemi aikati Islam yimsü toktsür pa kotari agi tsüngset; Pai Khristan yimsü agizüka liasü," ta metetdaksü.

Pastor den Khristan kati Herbert tasü mangji April 9 jembidang pastor kati, anepdang 9:00 ako meta angu. "Herbert-i evangelistic mapa Khristan ka jagi, "Pastor kanga yakyaka inyak. künati pa maitsüji reprangteta Nkoma, Nakaloke, liasü. Pa tekolak, teberem Busajabwankuba, Nauyo, aser teka nung zübo aika Kabwangasi aser Mbale yimti liasü," ta metetdaksü.



Aso mezüngbuba mapang Turkey kübok Ephesus ya Rome yimli nung yimti tulutibatem rongnung pezübuba liasü. Iba yimti nung aliba amphitheater noksa nung angur. Laishiba nung Tenyartem Mapa tapu 19 nung loktii tejashi nung Khristantem anema apusoba tatalokba tu iba amphitheater nung liasü.

**AO OSHI ANGAZÜKDAK:
TANÜ ANGAZÜKTSÜBA OJANG**



Prok

(v) ayimsünga enoktsü, odaktsü (sow seeds; tell)

* Alu nung metsü proktsüba osang yim ajak nung **prok**.

Pu

(n) süng asoba merang oset (axe)

* So asodang **pu** techira amshitsüla.

OLONG PAITEP # 6497

15x15 crossword grid with numbers 1-16 indicating starting positions for words.

TIPIEN

- 1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

- 1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nukla - 7
10. Tamendakdak/Nükjidosong - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 6496 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut, 9. Ajizük, 10. Ojala, 11. Semer, 13. Sen, 15. Kioktsü, 17. Itsük, 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua, 5. Mitsüktsü, 6. Azübenshi, 8. Lah, 9. Jangkok, 12. Akok, 14. Nashi, 16. Sür.

Agüja aliba noksa nung meputepi aliba 11 bushiang



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimiyim@gmail.com nung yokang mesüra Tir Yimyim bureau tem nung agüjang.

Mizoram varsity & Amrita Vishwa Vidyapeetham na longjemer STI hub tem amenoktsü

Aizawl, Rongchii/April 26 (Agencies): Mizoram University aser Amrita Vishwa Vidyapeetham (NIRF 2022 rankings nung 5buba) na Mizoram kübok Aizawl aser Serchip district nung science, technology and innovation (STI) hub tem amenoktsü atema longjemogo.

Iba inyakyim atema Department of Science & Technology, Government of India-i senotsü teyari agütsütsü aser iba ajanga capacity building, tribal tem skill development ajanga sustainable livelihoods

ajungkettsü, temesepba chiyongtsü anema tangazükba agütsütsü, digital literacy aser nutrition aser preventive health dak sendakba nung tangazükba agütsütsü aser iba ajanga Mizoram nung aliba nüburtem lenla ajak nung renloka aotsü asoshi teyari agütsütsü.

Iba inyakyim ya 'Mizoram Conclave on C20: Education & Digital Transformation' ta nüngja agütsür sentong ka ayongzüka agiba mapang amenoka liasü. Iba sentong ya Education and Digital Transformation (EDT) dak

sendakba nung Civil 20 Working Group-i ayongzüka aser university ana yagi host süa liasü.

Iba Conclave nung 'Education under C20/G20 & alignment to National Education Policy 2020' aser 'Digital Transformation under C20/G20' onük nung ajemdaker sensaksem sentong ana agia liasü.

Iba sentong nung Mizoram Angh Hari Babu Kambhampati tongti tesemdanger liasü aser chief secretary, Mizoram Dr Renu Sharma, IAS-i okila jembia liasü.

Manipur nung sepaitemi telungpur asem apu

Imphal, Rongchii/April 26 (Agencies): Manipur Police commando aser Assam Rifles na senteper telungpurtem meita aoba mapang sepaitemi Imphal temeket nung telok balala nungi telungpur asem puogo.

Official source kati ashiba agi, prangbong, two wheeler ana, injang, mobile handset asem, Aadhaar cards aser tashishitsü aketba kuli kakettek parnok ket nungi ngutetogo.

Telungpurtem aser parnok ket nungi osset balala ya taoba ghonda 36 tsüingda meita aoba mapang pua liasü.

Sepaitemi pua alirtem rongnung RPF/PLA nungi Imphal west district kübok Mongjam nung alir L Kiran Meitei (42) imphal nungi km

tenet shi pilar Patsoi tesem nung apu.

Manipur Police Commandos aser Assam Rifles sepaitemi pa ket nungi pistol ka, mobile ka, injang ka aser tashishitsü aketba kuli kaket kar nguteta liasü, ta police-i ashi.

Iba sülen ano Special Commando temi KCP (PWG) züingsem Usham Rameshore (34) Manipur Legislative Assembly, Imphal anasa par kidang lia puogo.

Yimti kübok iba tesem temeket nung pai anir rakzükrakdemba maparen balala benoka inyaksangshir, ta police-i ashi.

Pa ket nungi mobile ka aser takhangba shiti ka nguteta liasü, ta police-isa metetdaksü.

Maneni Imphal West commando temi Imphal east district kübok Kongpal Chingangbam Leikai tesem nungi UNLF züingsem ka puogo.

Police temi pua alisang ya Oinam Shanjoy Kumar (44) ta jangjaogo aser pai police tem dang pa 2010 küm iba telok nung aden aser pa tatamsa 2021 küm February ita pa indang commander den ajurteptsü atema Moreh-i oa liasü, ta ashi.

Police temi par kidang nungi Honda Moped ka pua liasü.

Telungpurtem aser parnok ket nungi ngutetba hadir aser kuli kakettek ajak police station tapet nem bendanga agütsüogo aser ken o maneni bushisüingdangdar, ta police-isa shisem.

Assam: MP Ajit Bhuyan aser tangar 13 anema ken o benok

Guwahati, Rongchii/April 26 (Agencies): Assam nung Chief Minister indang Vigilance Cell-i, Members of Parliament Local Area Development (MPLAD) fund ochi mashi ken o dak sendakba nung MP Ajit Bhuyan aser tangar 13 anema ken o ka benokogo.

Senotsü ochi meshi amshiba aser inyakyim meshidakba dak sendakba nung iba ken o ya special judge court nung benokogo.

Aija alirtem rongnung ACS Sharmistha Bora aser Hemanta Dutta densema temaba jenjang nung aliba ketdangsürtem

densema lir.

Iba ken o dak sendakba nung March ita ACS ketdangsür pezü mapa nungi anentsüogo.

Ken o ya Barpeta nung lenmang yanglutsü atema MP Ajit Bhuyan indang MPLAD fund nungi senotsü agütsüba mashi yimi amshiba dak sendaka lir.

Ken o asadanga sülen mapa shilem 75 minyakma tsüingda iba project atema bill agütsüba nguteta liasü.

CM indang Special Vigilance cell-i ken o bushisüingdanga sülen iba ken o ya temai adoka liasü.

Bushisüingdang ajanga mapa nungi anentsür aliba ketdangsür pezü yagi mapa matem tsüingda iba project atema bill nung sign asüba nguteta liasü.

Additional Commissioner of Kamrup Sukanya Bora lenisüba nung MP Construction Fund Committee-i iba mapa atema senotsü lemezükja liasü.

Rajya Sabha MP yagi Barpeta nung lenmang asem yanglutsü atema pa indang MPLAD Fund nungi sen lakh 28 agüja liasü.

Ajisüiaka lenmang meyangu aser sen agizüka agütsü atema bill taila benoka liasü.

Tuensang DC-i pharmacy/medical store tem nem tetuyuba agütsü

Dimapur, Rongchii/April 26 (TYO): Drugs and Cosmetics Act 1940 kübok Rule 65 dak ajemdaker Tuensang DC-i Tuensang district kübok aliba medical stores tem nem tetuyuba kar agütsüogo.

Tetuyuba nung Schedule 'X', 'H', aser 'H1' nung shilsema aliba mozütem, koba yimya agi tenokdanga agütsür aliba mozütem lir, item mozütem ya registered medical practitioner kati prescript asüba dak ajemdaker kwi agütsütsü asoshi tuyu paikaji dang agütsütsü metetdaksüogo.

Temalen shisema aliba mozütem ayokba indang register

balaka nung mangaoka ayutsüla aser mozü alirtem tenüing aser address, shiranger tenüing, mozü tenüing, kwi ayok ajak mangaoka ayutsü nüngdaker, koba küm asem tashi ayutsüla aser asadangtsü asoshi kecha tenokdanga magütsütsüla.

Iba den bendenloksema temalen shisema aliba tetuyuba den, tanurtem temeden kümzüka ayutsü aser tanurtem temesepba mozü amshiba nokdangtsü atema National Commission for Protection of Child Rights (NCPCR)-i amenokba Joint Action Plan nung shilem ka ama Schedule 'X', 'H' aser 'H1' kübok aliba mozütem ayokba Pharmacy

asur Medical Store ajak dang 2023 küm June ita tashi nungbo CCTV cameras amenoktsü aser iba den ita ana tashibo data bendena yutettsüa recording aser Storage facility amenoktsü asoshi tetuyuba agütsüogo.

CCTV camera indang Footage ya District Drug Controller Authority/ District Enforcement Force, Tuensang-i mapangshia asadanga alitsü, ta DC-isa metetdaksü.

Deputy Commissioner Tuensang, Nokchasashi NCS-i, iba tetuyuba sülen tashi anga manidakertem CrPC, Section 133 dak ajemdaker merenshitsü ta metedaksüogo.

Myanmar nung yimjung asoshi akok tashi inyaktsü: Ban Ki-moon



Naypyidaw, Rongchii/April 26 (Agencies): Taoba United Nations tekolakba Ban Ki-moon-i, Myanmar nung military-i 2021 kum sorkar atsüngtokba sülen azütokshi lendong tulu adoker aliba tembangdaksütsü aser teti atema yimjung benoktsü aser temzüng ozüng dak ajemdaker sorkar ka tentetsü atema asendenshir meranga inyaktsü mepeshia metetdaksüogo.

Ban, shiba taoba mapang alima lenirtem indang Elders advisory group nung züngsem ka lir pa military-i jaoka Myanmar semdangba sülen iba olen lemsatepa liasü.

"Military dang azütokshi anendaksütsü aser telok ajak tsüngda sensaksem tenzüksü atema mepeshitsü asoshi ni Myanmar-i aru," ta Ban-i Mongolbarnü ashiba den taoba mapang yimden yimsüsürtemi kumtetba National Unity Government (NUG) aser pro-democracy activists tema sensaksem nung shilem agidaksütsü nüngdaker ta ashi.

Myanmar nung general temi parnok anema nokdakertem ajak ya kiralongrartem ama züngshia arudar.

"Myanmar nung aliba nüburtem parnoki langa aliba ama yimji yimjung aser nüjiso ngua sasadema alitsü atema ni takokba tashi parnok nem teyari agütsütsü," ta pai ashi.

Army tekolakba General Min Aung Hlaing-i anir sepaitemi sorkar atsüngba sülen Myanmar nung mepetmesü tulu adoka liasü. Nüburtemi shimba Aung San Suu Kyi-i aniba National League for Democracy (NLD) party-i election nung takok tulu ngua tanabuba term yimsüsü asütsü asoshi tenzüksü lia military-i srokar atsüng aser lenir Aung San Suu Kyi sota ayu.

Military-i srokar atsüngba sülen nüburtemi longkak ait tenzü, koba military-i tashiyim amshia azüok aser iba ajanga nüburtemi prangbong hadir bener sepaitem den raratep tenzüka liasü.

Ban-i ashiba agi, pa military-i jaok aser linük yimtiba Naypyidaw nung Min Aung Hlaing den ajurutep aser 2011 nungi 2016 tashi quasi-civilian government tenteter aliba mapang tir Thein Sein dena ajurutepa liasü. State meyong Global New Light of Myanmar-i Mongolbarnü sangdong ka ajanga ashiba agi, sensaksem tangatetep nung kaogo.

Ajisüaka Ban-i, Aung San Suu Kyi den ajurutepba indangbo kecha melemsatep, shiba ken o balala nung aija kum 33 tepuokdak ayutsü atema obendang agütsür lir. Pai la den pa UN secretary-general asüba mapang tatesa ajurutepogo.

Military den sensaksemba mapang Ban-i, Association of Southeast Asian Nations' (ASEAN)-i lemtetba onük pongu benoka inyaksangshitsü aser taoba kum December ita UN Security Council-i yangluba bangzüng dak sendakba nung jenjang tapet agitsü nüngdak indang lemsatepogo. UN bangzüng ajanga azütokshi anentsü aser Aung San Suu Kyi o civilian tir Win Myint na densema yimden yimsüsüba dak ajemdaker tepuokdak yua alirtem ajak chioktsü atema ayongzükogo.

Military-i tayimtsü amshia Sagaing temeket nung yimtsüng ka maka tanur densema civilian 160 dak tema tepsetba ajanga alima kintem ajungai military aitsüba mapang ka nung pai linük semdangogo aser ashiba agi, pai iba tesem amakba atema

alima kintem balalai parnok aitsüba indang nenshia metetdaksüogo.

Maneni military-i shimba election ketdangsür ka Yangon nung anti-coup telok kati tepsetba sülen pai Myanmar semdanga liasü.

Military-i kuli kecha magütsü 2020 kum November ita election agiba nung ochi mashi aika sendaka lir ta shia sorkar atsüngogo aser election agishitsü asoshi tenanzükba agütsüogo, ajisüaka general temi election dak sendakba nung ozüng tesashi yangluba sülen NLD aser tanga party tem mezüngoksemteti tenokdangba agütsüogo.

Ban-i ashiba agi, elction ya kecha tebandang makai ochishia agitetsüsa tensa ka dangi aruba sülenang agitsü nüngdaker.

"Tang tensa mejungi aliba mapang election agiba ajanga azütokshi tali kumdaksütsü aser telemdang tali adoktsü aser result ya Myanmar nung aliba nüburtem, ASEAN aser alima kintemi magizükttetsü," ta pai tekümdangtsü metetdaksü.



OFFICE OF THE LONGPOK SEMCHIR TELONGJEM

HQ: MOKOKCHUNG

7th Buba Longpok Semchir Telongjem Inti Mungdang Ungma yimtsüng nung 12th & 13th Jan. 2023 amungba mapang "Lipok Tamendakdak Arangshi" Omen nung amendaker Shri. Sharinganin Longkümer, Hon'ble Speaker, Nagaland Legislative Assembly (NLA) Tongti Tejaoker sür Aoer yimtsüngtem nungi Longpok Semchir nübu merijangka tema atenshia par kibong ajanga Mungdangsanger ajak Poksütsü-a kanga takok tulu nung mungtetogo.

Iba Mungdang nung Longpok Semchir office ketdangsüa inyaktsü asoshi teküboklen shia aliba lenirtem ya kum Pezü (4) 2023-2026 atema shim.

1) Ketdangpurtem:

- President : Wb. K.Nokmarenba (Longsa)
- Vice President : Wb. Imnikenba (Longjang)
- General Secy. : Wb. Imkongnungba Lkr (Merangkong)
- Asstt. Gen. Secy.: Wb. Bendangwapang (Waromung)
- Kimen (Senyur) : Wb. Imotemjen Lkr (Chungtia)

2) Sen Ketdangsür:

- Secretary : Wb. Lanuwapang (Khar)
- Assistant : Wb. Amongsang (Longkhum)

Iba Mungdang nung tongtibang teinyaktsü bangzüng item ya renem:

- i) Longpok Semchirbo pei kinungtsü-i kinungbo kidong tenüng/nüngja mamshitsü renem.
- ii) Longpok Semchir lanurtem nungi UPSC 1stGrade nung takok angur nem Inti Mungdang amungba mapang khonang tetushi senpet agütsütsü lemtet.
- iii) Longpok Semchir kibaleboba nung asüngteta/merükteta alitsü nükjidong yur, 13th January, 2023 anogo nungi tenzüka Longpok dak nungi jakzüka aruba semchirtem teküboklen shia aliba tebouren tsüngda shinga kibalemba masütsü renem. (i) Longkümer (ii) Lemtur (iii) Mozür (Molier) (iv) Nokdir (v) Ajumer (vi) Longchar (vii) Walling.

Iba telemtetba ya Oboula Longpok dak nungi jakzüka aruba Semchir ajaki akhümtsüba anidaksü sangdonger.

Sd/- K. Nokmarenba Tir, Longpok Semchir Telongjem **Sd/- Imkongnungba Lkr Tongti Zülur, Longpok Semchir Telongjem**

ALI TAYOKTSÜ LIR

Nihoto nung ali plot asem ayoktsüba lir :
 1. Square feet nung Rs. 135/-
 2. Square feet nung Rs. 180/-
 3. Square feet nung Rs. 160/-
Contact No. 9362194700

Mulungnen O



Ojala Jongpongnungla (Yaongyimsen)
09.10.1933 - 13.04.2023

Onoki teti meima aliba tsürabur tajung ojala JONGPONGNUNGLA (Yaongyimsen) ajungbena iba akümüli wadang tembanger onok temulung zürepa shisabolua alidang kija-kibong aser temeimer lokti aser arogo nungi shirnokisa onok dang meima rongsen, nübo aser sarasadem agi yariogo, nenok ajak den onoki kanga pelaba mulungnen o ka yangi lemsateper.

Tsüngremi nenok taküm aser mapa nung tali azükarua moajangma.

- Temeim Jala jabaso aser Semchirsemmurtem.

CHUCHUYIMLANG Moatsü 2023

Date: 2nd May 2023
Time: 10:00 am
Venue: Anü Mai Amphitheatre

Compere : Miss Akumsangla & Miss Asenla CED, CBC
 Sarasademsü : Mr. Temjenmongba, Healing Centre Director, Chuchuyimlang
 Moatsü salem : Guru ChubatozungTatar
 Süngkong atemba : i/c. 5 Buba Riongsanger Süngpo Zünga

TETOKTEPA SENTONG I: YAR TSÜNGSANG
 Longzung Mopu ; Imlang Mopu
AROJU NUNG TENÜNG ATEMBA
 CKT Chuchuyimlang Town, Surep Lenden Club
 Aongmesang Ken : i/c. Chuchuyimlang Kaketshir Telongjem

TETOKTEPA SENTONG II: YAR TSÜNGSANG
 Mongda Mopu ; Impang Mopu
AROJU NUNG TENÜNG ATEMBA
 Tongpangsanger Club ; Rocky Club ; Aroju Club
 Aroju Moyu : i/c. 7th Buba Kosasanger Sungpo Zünga & Riongsanger Tambu Zünga
 Sempet agütsüba mapang : i/c. Tetendanger nungi (Judges)
 Tatem Sarasadem : Mr. Repazulu Deacon

TETOKTEPA SEMPET
YAR TSÜNGSANG :
 First : Rs. 20,000/- Second : Rs. 15,000/-
 Consolations : Rs. 10,000/- each
AROJU NUNG TENÜNG ATEMBA :
 First : Rs. 15,000/- Second : Rs. 10,000/-
 Consolations : Rs. 5,000/- each

Iran court kati US, Obama nunger dang senchi achir Tehran, Rongchii/April 26

(Agencies): 2017 kum ISIL Anüngdang iba lendong ya (ISIS) teloki amakba atema Iranian parliament ki aser United States sorkar aser tang Iran nung yimsüsüba taoba Tir Barack Obama amenoka aliba tentetsang densema nisung kar aser lokti indang mausoleum dak tenük tentet temi temelen sen yoker agüja nisung 17 tepseta agütsütsüla, ta Iran nung liasü.

court kati obendang agütsü. Court obendang nung Tehran nung June 2017 senotsü tsütsü teraksa nung iba lendong atalokdang agütsüba menoktsü sen tepsetba nisung asem aser million \$9.95, 'moral aser yiruba nisung trok indang punitive damages' atema sen nung ajemdaker linük yimtiba million \$104 aser million \$199 nung aliba court ajanga iba agütsütsü nüngdaker ta shia lir, anungji ajak senteper sen obendang ya agütsü, ta million \$313 jungnüa lir. judiciary indang official news (Maneni tapak 8 nung...)

India tetsür Hockey Team Australia den asayatsü

Rongchii/April 26, 2023 (Agencies): India tetsür Hockey team asaya pongu asayatsü atema Australia semdangtsü. Asaya pongu ya May 18 nungi 27 tsungda asayatsü. India team mezüngbuba asaya asem Australia team den asayatsü aser iba sülen Australia A den asaya ana asayatsü.

Asaya ajak MATE Stadium, Adelaide nung asayatsü.

India team mezüngbuba asaya May 18 nü asayatsü aser iba sülen May 20 aser 21 tanabuba aser tasembuba asaya atonga asayatsü. Maneni parnok Australia A den May 25 aser May 27 nü asayatsü. Australia tetsür team ya tang world ranking nung tasembuba nung lir aser India tibuba nung lir.

Iba asayamung ya Hangzhou Asian Games atema renemshiba asayamung ka asütsü, koba taküm September

aser October ita asayatsü lir. Asayamung indang jembiba mapang Chief Coach Janneke Schopman-i, "Australia den Australia nung asayaba ajanga tetsür asaya nung temaba jenjang nung aliba team den India team asaya medemangtsü asoshi maongka angutsü. Tongtibangsa iba asayamung ya China nung asayatsü aliba Asian Games atema kanga tongtibang asütsü, kechiyong iba ajanga team nem asayatsü asoshi maongka agütsüba dang masü saka koba lenla nungsa melenshitsü nungdaker iba indang tajungba angatetsü. Anungji iba asayamung ya onok atema kanga tongtibang lir," ta ashi.

2022 küm December ita FIH Women's Nations Cup final nung Spain akokba sülen India team kanga temulung lemteta Australia-i aotsü. Maneni 2023 kuma January ita South Africa semdangba mapang parnoki

goal 5-1, 7-0 aser 4-0 agi asaya asem akok aser asaya pezübuba goal 2-2 ta kasasa nung tembanga liasü. Ajisüaka kasa asayamung nung India team-i goal 1-3 agi Netherlands team mekoki liasü.

Iba den bendenloksema India teami 2021 küm Tokyo Olympics nung Australia team goal 1-0 agi koka Olympics nung tasembubaba dang asayaba mapang iba asayamung nung gold medal asem tashi koker aliba team ya koka Quarter-Finals atema mezüngbuba qualify süa liasü.

Commonwealth Games 2022 nunga semifinal nung India-i Australia den kanga meranga asaya ajisüaka atakzükja aliba mapang tembangba tashi nung team anaprongla goal kaka dang idaktsütet aser penalty asayaba Australia-i goal 3-0 agi koka liasü.

East Bengal Head Coach asütsü Carles Cuadrat shimogo



Rongchii/April 26, 2023 (Agencies): East Bengal head coach mapa abentsü atema taoba Bengaluru FC coach Carles Cuadrat shimogo. Pa den küm ana atema tenangzüktepba yangluogo.

Arishi küm 54 tain Cuadrat ya India nung mezüngbuba 2016 küm Bengaluru FC (BFC) nung assistant coach mapa inyak.

2016 nungi 2018 küm tashi India nung Inyakba mapang BFC-i Federation Cup akok aser mezüngbuba Super Cup akokba den India nungi AFC Cup final tongteta asayaba mezüngbuba team aküm.

2018 küm Spain nunger coach yagi BFC indang head coach mapa agizük aser 2018-19 season nung Indian Super League (ISL) koka liasü.

Pa lenisüba nung BFC ya ISL puti otsü nung league nung temaba jenjang nung tembanga kasa küm iba asayamung akokba mezüngbuba team aküm. Iba sülen taruba season nung Cuadrat-i BFC pur playoffs tonga ania liasü.

Cuadrat lenisüba nung BFC-i otsü tasen aika yangluogo. 2018-19 season nung parnok asaya 11 khen danga tamakok mongui asaya koba iba mapang

nung ISL nung otsü tasen ka liasü.

Pa inyaka aliba mapang BFC pur kidang asaya 17 tashi khen danga tamakok mongui asaya, koba ISL club tem rongnungi kidang asaya timtiba akokba lir.

Maneni 2020 küm February ita AFC Cup Qualifiers nung Cuadrat-i aniba team yagi Paro FC goal 9-1 agi koka liasü.

Pa asaya aliba mapang FC Barcelona youth team nung 1978 aser 1988 küm defender ama asaya. Pa 1986 aser 1987 küm U-19 Spanish Cup akokba FC Barcelona team nung densema liasü.

Maneni pa FCB first team nungi 1988 küm friendlies ana asayaogo aser 1985 UEFA European U-16 Championship nung tasembuba jenjang nung tembangba Spain team nung densema liasü.

2020-21 season nung India toktsür aoba sülen Cuadrat ya Cypriot club Aris Limassol nung assistant coach ama aser Cyprus' first division-i atuba sülen team playoffs tonga ania liasü. Pa tesüsa Danish Superliga club FC Midtjylland nung assistant coach ama inyakogo.

PM Modi-i National Games lapoktsütsü

Rongchii/April 26, 2023 (Agencies): 2023 küm October ita Goa nung asayatsü aliba National Games ya Ato Kilonser Narendra Modi-i lapoktsütsü, ta Chief Minister Pramod Sawant-i Bodhbarnü metetdaksü.

Iba asayamung atema renemshiba indang lepa reprangshitsü atema Indian Olympic Association mendenbula PT Usha den senden ka amenba sülen osangbenertem den sensaksemba mapang pa iba

osang lemsatepa liasü.

Iba senden nung State Sports Minister Govind Gaude-ia shilem agia liasü.

"National Games lapokba sentong ya PM maparen apir October 23 mesüra 24 nü agitsü," ta chief minister-i osangbenertem dang ashi.

Iba asayamung ya November 10 nü tashi asayatsü, ta paisa metetdaksü.

Asayamung lapokba sentong ya South Goa district nung Fatorda kübok Jawaharlal Nehru Stadium nung agitsü.

Kasa mapang nung IOA mendenbula Usha-i ashiba agi, iba asayamung ayongzükja asayatsü atema state renema lir.

Minister Gaude-i, iba asayamung nung asayatsü atema asaya 38 shima lir aser asaya balala asayatsü asoshi tesemtem ajak renema lir, ta ashi.

IOA indang technical team-i asayaba tesemtem ajak asadangogo aser ano team kati April 27 nü state semdangtsü, ta paisa metetdaksü.

ICC T20I rankings: Suryakumar maneni temaba jenjang nung lir



New Delhi, Rongchii/April 26 (Agencies): Bodhbarnü sayaba ICC men's T20I player rankings nung Suryakumar Yadav maneni temaba jenjang nung lir aser India nunger asayartem rongnungi pa kija top-10 nung lir.

Pakistan aser New Zealand na Rawalpindi nung asayamung tembangba sülen Mark Chapman aser Iftikhar Ahmed nata jenjang ka junga kümogo.

Chapman shiba taoba mapang 2018 küm jenjang 54buba nung liasü pai asaya ana nung khen run 71 aser khen run

104 ta yangluba sülen pa jenjang 48 tejakdangi tua tang 35buba nung lir.

Iftikhar shibai tatembangbuba asaya nung run 36 yanglua liasü pa jenjang trok tejakdangi tua tang 38buba nung lir. Mohammad Rizwan aser Babar Azam na sülen Pakistan nunger asayartem rongnungi T20I ranking nung pa tasembuba nung lir. Rizwan aser Babar na Suryakumar sülen tanabuba aser tasembuba jenjang nung lir.

T20I rankings nung jenjang melenshirtem rongnung New

Zealand nunger asayar Chad Bowes (batting rankings nung 118 nungi 8) aser Ish Sodhi (bowling rankings nung 16 nungi 14) na aser Pakistan nunger all-rounder Imad Wasim densema lir.

Imad batting ranking nung jenjang 15 tejakdangi tua tang 127 nung lir aser bowling rankings nung jenjan 120 tejakdangi tua tang 93buba nung lir. All-rounder tem rongnunga pa jenjang 44 tejakdangi tua 24buba nung lir.

ODI rankings nung Nepal aser Oman na ACC men's premier cup asayaba sülen Nepal nunger leg-spinner Sandeep Lamichhane jenjang ka tejakdangi tua tang 22buba tongtetogo aser Kushal Malla shibai ball 64 nung run 108 yanglua liasü pa jenjang 35 tejakdangi tua 110buba nung lir.

Oman nunger left-arm spinner Zeeshan Maqsood-a bowling rankings nung tang jenjang 49buba nung lir.

Iran court kati US, Obama nunger... (Tapak 7 nungi...)

Iba ken o nung aija alirtem rongnung US sorkar, Obama, taoba Tir George W Bush, Bush, Central Command (CENTCOM), iba indang taoba commander Tommy Franks, Central Intelligence Agency, Treasury Department, nok-nü yanglur Lockheed Martin, aser American Airlines Group dena lir.

Item telok mesüra kija indang rongsen kecha soita ayutsüsa Iran nunger taziokba kübok mali, aser court-ia iba compensation order ya komaser inyaka aotsü ajia shia mali.

Kiralongrar teloktem ayongshiba aser len aniba nung

US-i tongti shilem agiba indang America nunger ketdangtsür temi jembiba, ISIL densema kiralongrar teloktem tentetdaksüba nung CIA shilem indang US media ajanga osang prokshiba, kakat züluba aser US ketdangtsür temi o jembiba mechi US tenüing asener, ta website nung shia lir.

Ano US court temi kiralongrar mapa asoshi Iran tenüing sena obendang agütsübatem asoshi telangzüba agütsüba ama iba obendang ya agütsü ta judiciary ajanga ashi aser Iran nunger rongsen soita ayuba nungi sen ya menoktsü totuyuba agütsü.

BILEMDANGANG
"Khuret lemsatepba abenba ajanga tepongbaba kümdaktsür."